

Regional News Unit AIR Aizawl
Saturday, October 12, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Chief Minister Pu Lalduhoma'n Mizorama tuialhtheih man tihsan chu sut leh a nih tur thu a sawi.
- Luia nungcha leh sangha chi hrang hrang te an inthlah pun hun chhunga, tihchhiat leh tihbuai an nih loh na turin leh, him taka an inthlahpun theih nan sangha leh nungcha man khap rih a ni.
- Larsap Dr. Hari Babu Kambhampati chuan mipuite'n bank hman tangkai dan leh hamthatna awmte an dawn theih nana inzirtirna kalpui nasat a tul thu a sawi.
- Maharashtra-a Devlali field firing range-a training neih laia chetsualna thlengah Indian Army Agniveer pahnihin nunna an chan.



GOVT TO REVOKE FUEL PRICE HIKE

Chief Minister Pu Lalduhoma'n Mizorama tuialhtheih man tihsan chu sut leh a nih tur thu a sawi a, Mizorama kawngpui chhia te ngawrh zawka siam a nih tur thu a sawi bawk avangin Mizoram Commercial Vehicle Union chuan karleh Thawhtanni atanga lungawilohna lantir an tum chu an thulh.

Nimin khan Commercial Vehicle Union hruaitute hian Chief Minister Pu Lalduhoma an hmu a, Chief Minister chuan Mizoram Commercial Vehicle Union (MCVU) ten tuialhthei man sang ti hniam tur leh Kawngchhia siam hmanhmawh tura an ngenna chu Cabinet meeting hmanhmawhthlak kovin karleh Nilainiah an rel dawn tih sawiin Cabinet thu chhuak nghak turin a ti a, hemi hnuah hian tuialhthei man hi a chiang dawn ni a ngaih a ni.

An inkawmnaah hian Mizoram chhunga State PWD chan zawngah kawngsiam chak taka hmalak nise an ti a, a chhe zualpui ah sawrkar hmalakna mek bakah Company hrang hrang ten an chan chin ah chak taka hma la turin Chief Minister chuan a hriattir dawn a ni.



CONSERVATION OF RIVERS

Luia nungcha leh sangha chi hrang hrang te an inthlah pun hun chhunga, tihchhiat leh tihbuai an nih loh na turin leh, him taka an inthlahpun theih nan sangha leh nungcha man khap rih a ni.

Khapna thupek hi Governor chuan tichhuakin The Mizoram Fisheries Act, 2002 section 5(1) leh (2) behchhanin, Tun thla Oct ni 10 atanga December ni 10 thleng sangha leh nungchate man khap a ni a, nungcha tihhlum a, an chenna leh nunphung tih buai chu khap tlat a ni.

Luidung nungcha humhalh bikte hi Nghalim, Nghadawl, Lengphar te an ni a, Autonomous District Council huam chung tel lovin Mizoram chhunga Lui leh Luite zawng zawngah khapna thupek hi kenkawh a ni a, dan bawhchhia chu hrem tur an ni.



GOVERNOR

Larsap Dr. Hari Babu Kambhampati chuan mipuite'n Bank hman tangkai dan leh hamthatna awmte an dawn theih nana inzirtirna kalpui nasat a tul thu a sawi.

Nimina Reserve Bank of India Aizawl Office hotute a kawmnaah he thu hi sawiin RBI hotute chu bultanna tur nei remchanglote'n loan hmanga bul an tan theih nana an hnuai scheme pawimawh tak takte tun aia nasa lehzuala kawhhmuh thin tura chahin, mamawhtute chu panchilha an harsatna leh tanpui theih dan turte chena ngaihtuahpui turin a chah a. Sawrkar scheme pawimawh tak takte chu miretheite chawikan nana duan a nih avangin ngai pawimawh tura chahin Financial Literacy Campaign in rah tha a chhuah em tih chena enzui thin turin a chah bawk.

He hunah hian RBI hotute chuan Mizorama an hmalakna tlangpuite tarlangin, financial inclusion leh financial literacy campaign an kalpui bakah Lead Bank Scheme priority sector lending hnuai target za zela 40 an tihhlawhtlin thute, RBI in Unified Lending Interface a ruahman thute an tarlang a ni.

He huna tarlan a nih danin India ram State 10 leh Union Territory 6 te chu tunlai thiamna hmanga thlunzawm an ni tawh a. Mizoramah chuan Aizawl leh Serchhip District-ah hman tan tawh niin RBI hotute chuan District dang thlunzawm tuma hmalak mek ani tih an sawi bawk.



SOCIAL WELFARE MINISTER

Social Welfare Minister Pi Lalrinpuii'n Mizo hmeichhe zingah ruihhlo ngai tam zel chuan nawhchizawrhna a ti hluar tih sawiin ruihhlo do kawngah mi tin tanrual a ngai tih a sawi.

Mizorama ruihhlo do kawnga hmeichhiate tihchak leh zual dan tur inzirtirna 'Awareness programme on empowering women combating substance abuse in Mizoram' nimina Aizawl I&PR Conference Hall-a buatsaih a hmanpui na-ah he thu hi sawiin Minister chuan Mizoram chu Bangladesh leh Myanmar ramri-a awm an nih avangin ruihhlo a hluar phah a ti a, heng avang hian nasa zawka do a ngai tih sawiin hmeichhe zingah ruihhlo ngai an tam zel chu paw a tih thu sawiin mi tin tangrual chhungkua atanga ruihhlo do bultan turin a chah a ni.

He inzirtirna hunah hian sawm bik mithiamte hnen atangin ruihhlo ngai hmeichhiate leh a enkawlna kawnga mawhphurtute tana hriat tur pawimawh ngaihthlak a ni bawk.



HEALTH MINISTER

Health Minister Pi Lalrinpuii'n zuk leh hmuam hluar lutuk avanga cancer vei an tam phah chu pawl a tih thu sawiin thangthar zawk ten vaihlo kaihhnawih an hnar ngam nan zirtir an mamawh tih a sawi.

National Tobacco Control Programme, National Health Mission, Mizoram buatsaih Tobacco Free Youth Campaign 2.0 a hawanna ah he thu hi sawiin Minister chuan thangthar zawk ten vaihlo chu an hnar ngam theih nan zirtirna pek an ngai a ti a, an fihlim theih nan mi tin te tanrual puiah sawmin vaihlo leh a kaihhnawih chi hrang hrang a rem theih nan thawhho a pawimawh tih a sawi bawk.

Minister chuan mahni theuha bultan a pawimawh thu sawiin zirtirtute chu an thawhna school theuhah an zirlaite vaihlo laka an fihlim theih nan tan la thar leh zual turin a chah a. Department enkawltute pawh an enkawl department theuhah vaihlo leh a kaihhnawih ti tlem zawnga hma la theuh turin a chah a ni.

Global Adult Tobacco Survey 2016 - 17 tarlan danin Mizoramah za zela 58.7% -in Vaihlo, zuk leh hmuam an ti a, Tobacco Free Youth Campaign chhung hian zirna In leh puipunna hmunah vaihhlo leh a kaihhnawih that lohzia inzirtirna kalpui a ni dawn a, vantlang hmuna meizuk avanga dan bawhchhiat theih te mipuite hrilhhriat an ni dawn bawk a ni.



PWD MINISTER

PWD Minister Pu Vanlalhlana chuan Mizoram sawrkar chu kal phung thar sawrkâr a nih tawh avangin NH-06 pawh tun hma ang mai maia dawngdaha enkawl a rem tawh lo a ti.

Nimin khan PWD Minister hian National Highway-06 huam chhûnga Khamrang leh Kawnpui inkar kawng siam mêk chu a hmunah a tlawh leh a. PWD Minister chuan kawng siam chu chak taka kalpui tur leh hetih rual hian mipuite harsatna thlen lo thei ang bera hna thawk turin thawktute a fuih a, 'NH-06 Kawnpui leh Khamrâng inkar chu Mizoram mamawh lâkluhna hnukpui a nih avângin a chhe rei thiang lo a, chak taka siam a ùl a ni', a ti.

Pu Vanlalhlana chuan, Contract hna reng reng, kawng siam a ni emaw thil dangah pawh dawngdah taka hna thawk thinte sawrkârin a dim dawn lo a ti bawk a, Mizoram State Project Monitoring Committee-te mit tlung lova hna thawkte chu an phu tawka an chung thu ngaihtuah a ni zel dawn a ni, a ti.

Pu Vanlalhlana chuan, tun dinhmunah NH-6 hi duhthusamin siam hlei thei lo mah se, lirthei engpawh kal theiin enkawl chhonzawm mek a ni a, Mizoram chak lakna kawng ber a nih avangin englaipawha lirthei kaltlang theiha enkawl chhonzawm zel hi sorkar chuan a tum flat a ni," a ti.

Kuminah Mizoramin fur a tawrh nasat thu leh ruah tui tlak chhung a rei thu sawiin, tunah hian Aizawl khawpui hmun hrang hrangah kawng chhe zual thawm that mek a ni a, ruah tui tla tam han ziaawm se a aia tha lehzuala kawng thawm thata siam a ni zel dawn a ni', a ti.



AGNIVEER DEATH IN MAHARASHTRA

Indian Army Agniveer pahnih chuan nunna an chan a. He accident hi Maharashtra-a Devlali field firing range-a training an neih laiin a thleng a. Indian Army sawi danin, Rajkot, Gujarat a mi Agniveer (Gunner) Gohil Vishvarajsinh leh West Bengal atanga lo kal (Gunner) Saikat te chu line of duty-ah nunna an chan a ni. Army chuan a tawrhpuh thu sawiin, he thil pawh thlengah hian lungngaihna tawh chhungte tan a takin an awm reng tih an sawi. Field firing laia accident thlen chhan hriat chian nan court of inquiry kalpui a ni tawh bawh.

